

## ■ MOSTRE DAL CINE

## Al Visionario tre dîs di proiezioms

La cuarte edizion de Mostre dal Cine, festival dal cine european intes lenghis identitariis, si davuelzarà li dal cine Visionario di Udin dai 25 ai 28 di Novembar. Il festival al è organizât dal Centro espressioni cinematografiche di Udin inte suaze di Suns Europe manifestazion artistiche e culturâl europeane intes lenghis identitariis metude adun in colaborazion cu la Arlef e cul contribût de Regjon Fvj, il Comun di Udin e la Provincie di Udin e in associazion cun Informazione Friulana, Fondazione Teatro Nuovo "Giovanni da Udine", Fondo Audiovisivo Fvg, "Bottega Errante" Associazione Culturale, Associazione Culturâl "Il Laboratorio".

La Mostre dal Cine, che si vierzarà cul luncmetraç basic Loreak di **Joan Garaño** e **Jose Mari Goenaga**, pluripremiât a nivel internazionâl e presenterà films che a vegnin de Catalogne, dai Paîs Basc, de Galizie, de Ocitanie, de Sardegne, de Groenlande, dal Gales e dal Friûl. In dut, il festival al presente chest an 24 films.

## SCOLTADIS DI DRIUS

## Al baste ameti

Mi soi rindût cont che par vè pàs in famèe al baste amèti di vè simpri tuârt.



Bruno Pizzul

Cemût jerino îr?, Cemût sino vuê? Cemût sarino doman? Di chestis trê domandis di fonde al partîs **Claudio Romanzin**, il curadôr dal Strolic furlan pal 2016, par fâ une riflession sul passât, il presint e l'avignî dal Friûl e dai Furlans. Di fat il librut de Societât Filologjiche Furlane, che chest an al rive al numar 97 de sô tradizion e che al compagne il letôr par dut l'an cun poesiis, contis, proverbis e mûts di di furlans, al à par teme Îr, vuê e doman.

"Rispuindi a la prime domande al è stât vonde facil - al mutive il curadôr - o jerin une societât rurâl cuntune culture implantade sul rispjet de tradizion e sui valôrs di lavôr, dignitât e religiositât. Dun-

# Îr, vuê e doman cul Strolic

Presentade la edizion numar 97 dal librut de Societât filologjiche furlane che al compagne il letôr par dut l'an cun poesiis, proverbis e mûts di di furlans, metût adun di **Claudio Romanzin**.

cje o vin sielt un pocj di detulis che a rispjetin chescj elements e che a son tant che un speli dal mont dai nestrîs vons". Sul timp presint la riflession e à puartât a cirî i simbui dal Friûl di vuê, ven a stâi lis robis e lis personis che a vegnin tal cjâf cuant che si pense al

Friûl. Cussì, a ret di riferiments classicis tant che Aquilee, la bandiere o il Tiliment, o cjatin ancje il giornalista di Cormons **Bruno Pizzul** e il frico, ma no plui Macôr e Fortunât e nancje il fogolâr. E doman? "O vin fat fente di fâ un viaç tal Friûl di chi a cent agns - al va indevant Romanzin - tal an dal Signôr 2116, cun dodis cuadrants in poesie che a contin di ambient, religjon, centris comerciâi, politiche e vie indevant. Cuiass se lis robis a saran pardabon cemût che lis vin imaginadis!".

## PIÇULIS E GRANDIS CONTIS

Pal rest, tantis piçulis e grandis contis di dut il Friûl, scritis intes diferentis varietâts de ma-

rilinghe massime di chei che a fasin i cors pratics di lenghe e culture furlane de Filologjiche. Ancje i fruts di scuele e lis lôr mestris a àn dade une man: i dissens a son dai scuelârs des primariis dal Istitût comprensif di Travès.

La presentazion, za fate a Udin di bande di **Gianni Colledani**, si le fassarà ancje a Gurize vinars ai 27 di Novembar aes 6 sore sere, inte sede de Societât Filologjiche in vie Bellini 3, biel che sabide ai 12 di Dicembar si larà a soreli a mont: apontament inte sale consiliâr di palaç Rota a San Vît dal Tiliment aes 3 e mieze daspomisdì, in ocasion de scree dal cors pratic di furlan.

Insieme cul Strolic si presente ancje il Lunari pal 2016, burîf fûr cu la poie de Bancje Popolâr di Cividât. Chest an lis figuris dal Lunari a son lis bielîs carulinis dal fonts conservât in Filologjiche, un preseôs patrimoni documentâl che nus permet di fâ mes par mès un viaç ideâl ator pal Friûl, di Udin fin Tumieç passant par Cividât, Pordenon, Palme, Gurize e altris citâts dal Friûl come che a jerin une volte.



ilfriuli@ilfriuli.it

Euronews informa

## De Provincie di Udin 68.000 euros par promovi i nestrîs prodots locâi

Al è di 68 mil euros l'impuart che la Provincie di Udin e à destinât al sostegn di events, manifestazioms e iniziativis di promozion indreçadis a la valorizazion des produzioms tipichis dai nestrîs lûcs. Trentecinc lis domandis contentadis che a rivuardin ativitâts puartadis indevant di Comuns e sogjets privâts (Pro loco, associazions, consorzis di tutele, cooperativis agriculis, ...). La assegnazion e je stade fate buine de Zonte provinciâl su propueste dal assessôr a la Agricoltura Leonardo Barberio. "Cun chest ripart sostignût midiant fonts propriis di belanç - al met in evidence Barberio - la Provincie di Udin e



indrece risorsis a iniziativis di promozion di rilevanza provinciâl dedicadis al agrolimentâr Made in Friuli. Produzioms agriculis di ecelence e alte cualitât che a son al centri di fiestis, sagris, manifestazioms

enogastronomicis che a tirin dongje sucès e grande partecipazion di public. Si trate di ocasions che a smicjin a plui obietifs: la valorizazion e il cumierç di prodots dal lûc, il preseament dai operadôrs

dal setôr, la promozion dal teritori dal pont di viste turistic, ma ancje il cjapâ drenti interiis comunitâts tai events che a devenint cussì ancje moments di agregazion pai nestrîs paîs". A son cjapadis drenti inte tabele des iniziativis finanziadis la "Mostre regionâl dal miluç di Pantianins", la manifestazion "Glemone, formadi e dintor", "Un biel vivi: la culine e promôf la cualitât", metût sù dal Consorzi tra lis Pro loco de Comunitât culinâr, la mostre dai sparcs di Tavagnâ, la fiere dai vins di Buri, ma ancje la fieste de batidure promovude de Associazione amis de Civiltât contadine, la cuinte fiere dai prodots tipics dal Comun di Cjarlins o l'event de sierade inmaneât dal Comun di Cosean. Tra lis ativitâts sostignudis o cjatin ancje propuestis editoriâls, iniziativis indreçadis ai zovins par insegnâur a bevi in mût responsabil, cunvignis, ativitâts informativis, mostris e marcjâts.